

黃安縣志卷之八

知黃安縣事

朱錫綬
胡承組

主輯



人物志

儒林

自太史公傳儒林以後史氏因之安邑由明迄今名賢蔚起雖造詣有淺深出處有顯晦要皆根本學問足以羽儀世教者也連類紀之如經天緯地曰文勤學好問亦謂之文焉爾志儒林

詹同字同文舊名書其先婺源人也生而穎異獨抱竒

黃安縣志

人物卷八

儒林

一

氣元學士虞集以其弟槃之子妻之至正中舉茂才異等授柳州路學正遇亂道梗因家黃州僞漢徵爲學士承旨兼御史高皇帝平陳召爲國子博士易今名陞考功郎中丙午爲起居注時命有司求遺書上謂公曰三皇五帝之書不盡傳於世故後世鮮知其行事漢武帝購求遺書六經始出唐虞三代之治始可得見武帝雄才大畧後世罕及表章六經開闡帝王之學大有功於後世吾每於宮中無事輒取孔氏之言觀之如節用愛人使民以時真治國之良規孔

子誠爲萬世師也命考宗廟時享禮具元年上謂公等曰國史貴直筆予平日言行是非善惡汝等皆當直書勿隱諱使後世觀之不失其實洪武元年四月命畫古孝行及起家戰伐歷試愁苦爲圖以垂世訓上謂曰朕家本業農祖父皆長者世承忠厚積善餘慶以及於朕今圖此以貽子孫俾知王業艱難公對曰陛下昭德垂訓莫此爲切上曰富貴易驕艱難易忽久遠易忘後世子孫生長深宮惟見富貴易於奢侈不知祖宗積累之難故示之俾朝夕覽觀庶有所警也嘗正音樂進所訂釋奠樂章下太常用之是年以翰林待制遷直學士明年陞侍讀學士劉基疏請加禮大臣公因取戴記及賈誼疏以進且復開說愷切上深納之又嘗論公曰古人爲文章或以明道德或以通當世之務典謨之言明白易知無深怪險僻之語至如孔明出師表亦何嘗雕刻爲文而誠意溢出使人誦之自然忠義感激近世文士不究道德之本不達當世之務詞雖艱深意實淺近即使過於司馬相如揚雄何禕實用自今翰林爲文但取通道

黃安縣志

人物卷八

儒林

二

理明時務者無事浮藻四年陞吏部尙書有勅諭之
六年爲學士承旨兼吏部尙書上御奉天門謂公曰
論行事於目前不若鑒之於往古卿儒者試言古先
帝王爲治之道公對曰帝王之治莫善於唐虞三代
可以爲萬世法上曰三代而上治本於心三代而下
治本於法由於心者道德仁義其用爲無窮由於法
者權謀術數其用有時而窮然爲治者違乎道德仁
義必入於權謀術數甚矣擇術不可不慎也是年命
公與宋濂等修日歷爲總裁官七年五月書成自上

黃安縣志

人物卷八

儒林

三

起兵臨濠至六年癸丑冬十二月凡征伐次第禮樂
沿革刑政設施羣臣功過四夷朝貢之類莫不具載
爲一百卷藏金匱副在秘書監公及宋濂又言日歷
藏之天府人欲見之有不可得請如唐太宗真觀政
要分類更輯聖政爲書以傳天下後世上從之分四
十類自敬天至制蠻夷凡五卷名皇明寶訓凡有聖
政史官日紀錄之隨類增入與劉基宋濂侍宴便殿
公被酒還揮毫賦詩贈黃昶字大如尊會傳宜公餘
醒未解上謂公曰卿醉未醒耶公對曰臣雖醉猶能

賦詩贈黃秀才秀才謂祖也上曰詩何在公曰在史館中命濂亟取之上笑曰朕卽和同詩卿當爲朕書之尋以老乞歸上賜之勅褒嘉之以翰林學士致仕未幾復起爲學士承旨公操行耿介終始清白所著有天衢吟嘯及海涓集子徽歷官監察侍御史僉都御史洪武十七年陞左都御史上以徽奉職公勤詔復其家二十年爲吏部尙書兼左都御史明年以公子太子洗馬紱爲尙寶丞二十五年加太子少保兼吏部尙書都御史公以才勝大誥稱徽剛斷嫉惡不容奸僞使吏髮蓬面垢容愁肌瘦不異羈囚以不得肆其貪故若是父子俱爲吏部尙書自公始後坐藍黨死徽第三子世家於此從子希原爲中書舍人善大書兼歐虞韓柳體凡官殿城門坊扁皆其所書

吳琳字朝陽中和里人西山先生子也公性資純篤力於問學通毛詩小戴記平陳之歲太祖徵用荆楚名儒用詹同薦召爲國子博士與同並教胄子公才藻不及同至商確經義亶亶不倦同自謂不及公遠甚上每聽政暇召公咨時事輒進嘉言嗣遷浙江按察

黃安縣志

人物卷八

儒林

四

司僉事歷貳離臺皆効職有才名入爲起居注吳元年命同魏觀求遺賢於四方陞太常卿進兵部尙書京闈鄉試上曰琳經學優令與司業宋濂典試事洪武三年改吏部尙書賜誥褒美之時給事中侯庸署侍郎事公旣入吏部與詹同迭視事尋公以老乞致仕旣家居上嘗遣使察之使者潛至公旁舍見一農人坐小几拔秧布田貌甚端使者問曰此有具尙書者家何在其人尙在否農人歛手對曰琳是也使者還白狀上益重之弟琛字天錫歷官衢州府同知萬

黃安縣志

人物卷八

儒林

五

歷十二年知縣余相申詳學道王圻批允崇祀鄉賢祠

耿光字謙甫號筆崖年十九始發憤爲舉子業治胡氏春秋茹苦刻厲成化辛卯舉人歷授河陰儀真江陰衢州四學博課諸生率如課其家子弟應聘分考所在得人宏治甲子於四川正德丁卯於順天嘉靖壬午於福建乙酉則主試雲貴也初四川之聘未至也有貴勢遣人以重賄丐錄其子公焚其書麾使去曰天鑒在茲矣敢昧此良耶性篤孝每念養不逮親居

嘗悲愴有詩曰父母人皆有如何我獨無茫茫天地裏自覺此身孤至今誦者感焉從弟大賓配彭氏寡居有志操公歲製衣珥貽之歲歎捐俸賑族嘗慕范文正公之爲人欲置義莊建義塾事雖未就志可模矣

彭台字公甫學者稱爲東莪先生大父諱文明業儒以胡氏春秋教授弟子父鳳儀中正德己卯鄉試早卒時公僅四歲識趣穎異不羣嘗侍諸薦紳燕坐聆其語或計較名利心輒鄙之語人曰讀聖賢書列冠裳

黃安縣志

人物卷八

儒林

六

其言齷齪若是世何賴焉聞有善言懿行識之不忘稍長讀書務根極理要一日讀性理羣書忽大感奮慨然有必爲聖賢之志嘗爲帙籍記日履上題曰天鑒在茲甫踰冠舉嘉靖己酉鄉試益孜孜以明道善俗爲己任雖窶空晏如也有同年友寓書勸之干謁有句云不解如何是坐忘公答之云顏子坐忘當於簞瓢中求之其友慙而止壬子歲病餽粥不給歲當計偕例有道路費同年代取貽之公恚曰此爲計偕故吾旣病安敢濫此爲朝夕計卒還之病亟友人問

之至唏噓流涕公曰古人舍生以取義吾命自天非
舍也歿壽不貳君何悲焉卒年二十九貧不能斂同
志友劉思右等醵金殯之生平學慕宋儒以誠敬爲
宗不妄言笑清標雅度望而知爲有道士也隆慶年
督學顏批允崇祀鄉賢祠

吳心學號少虞泰仙里人家世業農一意孔孟之學勅
斷家事隱似馬山中鑿山開逕倚石爲壁引木爲巢
於絕頂兩岩間面柱靜坐者久之尋復訪學求友足
跡幾遍海內收遺書數百卷以歸講會益力教人以

黃安縣志

人物卷八

儒林

七

下學上達爲宗晚訂一集名洞龍集居山中凡二十
年而卒初八山鋤石得記云似馬山中出洞龍學者
稱爲洞龍先生督學胡公顏其門曰洞龍書屋

盧大儒世居中和河東學者稱爲東河先生少穎悟讀
書日夕可盈寸稍長博極羣書是時士大夫多浸淫
於良知家言公獨取周程張朱之書精究其理註五
經解凡西銘太極多所發明能補宋儒所未及嘗自
言曰學聖賢者在身體力行何事沾沾口耳爲一時
翕然宗之中明嘉靖丁酉副車授浮光唐縣兩學博

陞鳳陽郡倅未抵任而卒尤精胡氏春秋卒之前一夕猶取所著麟經集署其上曰三更睡五更起不如此不如死切囑兒曹習弗已後盧氏多有業是經而獲售者其垂教深矣

耿定向字在倫三歲時有公卿到門者問其祖曰更有上者否曰獨有聖賢耳曰兒當爲聖賢矣由是潛心理學登嘉靖丙辰進士授行人擢御史疏劾太宰具鵬六事語侵嚴嵩嵩爲管救事竟寢出按甘肅尋改南中督學開崇正書院以明道彰教爲已任晉大理

黃安縣志

人物卷八

儒林

八

丞與高拱忤摘判橫州拱罷量移衡州推官萬歷中累官副都御史以內艱歸起復撫閩會詔下方田法公摹地圖揭之後屏山硯水涯之間咸若目覩又手條八法布之不數月報竣廣寇林道乾訶海上公用計討擒之丁外艱起復爲都御史晉戶部尙書總督倉塲九疏請罷予告歸家居七年講明理學一時從遊者有若臨桂令焦伯賢端江寧廣文華貞季明經殷德夫李瀚峯王以衍詹孟仁楊道南孝淳潘朝言左春坊殿撰焦漪園竝僉憲管登之志道少司寇吳

伯恒自新侍講鄒汝光德溥杭州太守方思善揚丁
惟寅新野令李士龍登進士李維明王德孺李湜之
學錄陳桂林應芳學士殿撰沈君典懋學戶部司務
黃守拙奇士尚寶卿潘去華士藻及公弟八先生仲
臺少司馬叔臺凡二十五子公生平著有碩輔寶鑑
要覽四卷先進遺風二卷庸言二卷文集二十卷俱
四庫全書詳大學括義一卷小學衍義二卷載通
通志藝文志佚此
外有編簡類編奏疏牘草教學商求閨訓禮纂牧要
篇譯異編儒宗傳大事譯觀象黃安初乘觀生紀俱
載

黃安縣志

人物卷八

儒林

九

家 卒年七十三贈太子少保謚恭簡

耿定力字子健恭簡季弟也隆慶辛未進士授工部主
事出守成都遷按察司副使督學闔中首錄蔡清陳
真晟後裔以示風向累遷南僉都御史督操江疏言
權使罔利數奸已復上疏極言中使之害累官南兵
部侍郎卒贈尚書生平學問以求仁爲宗真修實詣
超然自得仲兄定理隱居不仕兄弟相與講學不倦
學者稱八先生羅近溪贊曰儒者之高蹈聖世之逸
民理學宗工其八先生乎

王心正字定宇萬歷己卯舉人自建縣以來舉於鄉者自公始嘗應聘雲南得士六人多捷南宮人稱冰鑑後歷官嘉興通判有清操

盧堯臣字贊勳號欽父幼聰敏通五經八歲能文十三補弟子員食餼弱冠登賢書初上春官心動亟還家父已病不起哀毀骨立撫愛幼弟萬歷庚戌成進士授益都宰有龐好仁賄丐者冒工人殺主而通其室鞫實以龐抵罪一時勢豪咸屏息王子應山東同考聘元魁皆出其門後致仕隱居與其徒講學以自老

黃安縣志

人物卷八

儒林

十

卒年七十五著有三不乃集崇祀鄉賢

耿汝愚字克明號古愚恭簡公冢子也年十七八泮兩登副車性嚴毅狷介不蹈時趨不屑詭遇以此屢躋塲屋遂絕意仕進閉戶著書有耿氏春秋自娛篇自怡篇江汝社集四六草尺牘草魚蟲考烏光傳而於字學尤精著韻會類編恭簡歿家益困公歎曰出仕不過上柱國居家不至十萬安可比諸人乎乃廢著述修計然之策不二十年竟至十萬年七十卒

耿汝恣字克勵定力之子也少聰穎好學寓目不忘性

恬淡寡欲終日正襟危坐常以古人自期與人交溫
語霽色至大義所在又凜若冰霜萬歷乙卯舉於鄉
再上公車不第歸與焦弱侯艾千子諸名家論文賦
詩遊於五雲天臺間家事概置不問著有春秋愍度
一書

秦如容字介臣號五梅性至孝十三喪母隨父讀書年
二十八庠父爲娶室泣應曰兒伴父七年不忍吾父
暮年獨處及父卒承父志以館穀孝養祖母不以累
季父天啟丁卯舉於鄉署河南唐邑教諭崇禎甲戌

黃安縣志

人物卷八

儒林

十一

成進士官中書值大旱奉旨禁屠宰胥私饌以進公
愕然具疏言狀上卽令公按治中書榘楊之設所由
始也尋遷行人念安邑赴公車與需次京華者乏停
驂所倡首捐俸建置會館丁丑銜命典試松江過蘇
有寒士馬姓者以貧窶訴卽贈以五十金已卯分校
北闈得士十有八人所者有雪浪篇問有山坊諸集
庚辰卒贈徵仕郎父獻中以子貴贈如職子天寵天
麟扶襯歸與周孺人合葬崇祀鄉賢

曾師孔中和里人性穎異善屬對客曰雪溶山露骨對

曰風過水生鱗客曰畫動魚龍動對曰棋行車馬行
滿座嘉歎讀書明大義恥襲章句父沒庶弟甫十齡
撫育訓迪備極友愛以歲薦補巴陵司訓廉潔自矢
太守郭養甚器重之代巡宋公特疏題薦詎以年六
十卒於任子岳年以明經爲元城令有賢聲孫以貫
曾孫德懋皆象賢濟美文名炳蔚天道固久而益驗
云

張鵬翔字拱北中和人系出睢陽忠烈公公始祖文德
占籍黃岡後析置黃安父廷舉生二子長公次繼軫

黃安縣志

人物卷八

儒林

三

公穎異讀書五行俱下事繼母孝繼軫沒字其孤如
已出族戚輩失身他姓力贖以歸凡可以解人紛難
者毀家不惜癸未里中集黨千餘大肆焚劫公與仲
子百程糾堡殲其渠而脅從者多所存活後舉鄉飲
正賓與諸弟子講尚書於壁山爲文下筆數千言乞
者趾相錯公樂此不倦年八十卒崇祀鄉賢著有壁
山文集若干卷

勲字欽父崇禎乙亥拔貢不屑俗學獨肆力於五經
諸史兼精詩賦明末遭亂隱居教授生徒數百人或

勸之仕勲曰亂不學何以治又謂王通以禮樂屬弟
子無有受之者卒成開元遺憾作撥正諸書以寓王
道年八十餘臨終謂子孫曰我韓氏遷楚北十餘世
書香矣後必有興者當慎守吾集以往至曾孫庚寅
成進士以唐宰行取

張希聖字亞石邑庠生學品純正邑令蕭公延爲子師
因徧覽二十一史學益加博會安陸有異鳥聖日明
紀載萬歷十六年此鳥見於秀水鄉人面鳥身頷下
有白鬚長三尺其年大水舉坐歎其淹洽父歿哭之

黃安縣志

人物卷八

儒林

三

失血事孀母姚氏孝養備至季弟希天患病親調藥
餌試寓齊安拒一奔女其實行皆藉藉人口者而艱
於一第年五十卒有詩文遺稿藏于家子三棨棨條
黃漢臣字勒鼎邑庠生篤行好學行文以氣勝

國初土寇披猖密書誘鼎鼎潔身遠遁嘗捐金還從弟產
教孤子使成名備棺以給宗族之貧者但久困諸生
中年六十由歲薦赴京應試有爲謀卽選者以父年
老辭歸閉戶著書有四書解及毛詩章句藏於家
耿邁宗字遠倩幼具成人之度讀書不解輒自批其頰

十五八泮有文名詩賦書法皆工後遭亂習孫吳之法兼精卜筮

本朝定鼎復潛心理學寓意丹青雖瘦骨稜稜然神采煥發讀書恒午夜不寐卒年六十有一著有焚餘草韓各世字友生灑源里人也祖勳選拔明經積學篤行父瑞璋生世踰月而歿母吳氏苦節撫守四十三年無別師盡乃祖之家學明季紛亂士多怠荒世獨閉戶讀書不輟每慮兵燹頻仍爲壁藏石瘞數千萬卷摘錄其要爲小本攜帶於身以自披閱

黃安縣志

人物卷八

儒林

四

國初苦無書遠近借讀者戶外屢常滿有就業者更資以膏火講說不倦母亦喜世讀書時加勸勉但厄於功名卒不遇母沒廬墓三年又著述經史詩文於廬中者二年卒年六十四著有韓氏庭訓類解三十卷子二長庚旦庠生次庚寅進士又次庚延早殤以子貴贈文林郎

蘇光轍邑庠生字汝德孝廉耿九一之師也博學多聞兼工書法幼試童子後期告考粹無卷以便面書其文進學使者深賞之擢居類官吳敦之諸先輩結社

江汝而轍與焉孝廉耿克勵爲之傳曰吾兄九一夙稱神童骯髒自負不屑居人下顧北面事先生執弟子禮又屢爲名賢傾慕觀克勵之言轍之聲譽藉藉當世久矣性至孝嘗侍尊人食一語少忤父怒以碗撻其面轍長跪拭碗重進色加婉父爲霽顏析產推腴者與孤姪以慰親心有族子失身失產不憚艱險贖還之幾攫重禍不顧也洵乎品學兼優者矣

吳光龍字荀長十歲能文十八爲學使董思白所賞識入黌序明年食餼儀部公喜曰弓冶固有在也旋以

黃安縣志

人物卷八

儒林

五

選拔赴京應試取第一文譽日隆與秦中翰五梅共捐貲買地建置會館及令廬江革陋規釋無辜有直指以逋贖緩另勒代償訶得其實置不問僅八閱月忤上官意將掛冠而賊氛犯境矣後解組歸宦橐蕭然惟葺先人所遺萬槿園冀得休息詎軍旅連年公以一身弭激變杜株連懲叛僕保全實多性喜遊覽善詩古近體著有金斗吟西山詠支型山紀西湖紀諸集工書法尤長徑尺扁書凡商周彝鼎晉唐書畫官哥窯器賞鑒真贗不差累黍一時推爲風雅之宗

壽終七十有九生子二暉偉象賢繩武蒸蒸未艾焉
程之渾字內昭號雪門司理繼善長子性端謹善屬文
工真草書法餽於庠屢試冠軍以己卯副車授鎮江
別駕尋遷揚州郡司馬晉淮安太守居官平易近人
多惠政時中原板蕩公喟然曰修道者必度其時今
時事如此而猶徘徊顧戀所謂滑泥揚波同其流矣
遂投簪去宦橐蕭然里居恂恂退讓言訥訥不出諸
口不立崖岸不雌黃人物不見喜愠之色事父盡養
志之孝課弟篤友于之誼奩田數百畝媵僕十數人
能高推讓風與羣從共之无私已有由是鄉里交譽
以疾卒乏嗣惜哉

黃安縣志

人物卷八

儒林

六

盧之慎字敬生號鈍翁幼穎悟善問難從諸父司理堯
臣學九歲能屬文補弟子員食餼尤嗜古未弱冠卽
於經史子集翻閱數遍赴壬午秋闈聞賊陷邑城毋
以罵賊死繭足哭奔歸避難山砦人爭攜財物公獨
載縹緲以隨生平著作等身刊有四書偶聯春雪迴
文行世又有玉梨緣鞦韆會福堂旗仙草婚玉馬墜
諸傳竒皆擅騷壇之勝與先達結社赤壁艾千子譚

友夏呼爲小友以憾切終天不與賓興由明經授光化新寧學博俱多所獎拔歸休後年七十六猶著五倫攸敘錄未竟而卒子綜績俱以能文名

程一棐字坦之號篤臣甫四齡隨父村塾不與諸童戲後補弟子員家貧寓岐亭被寇焚掠公以濕絮蒙其母突火出乃得免性好學手不釋卷爲文日可三十篇順治甲午舉於鄉兩偕計吏不售就富川學博轉武昌教授值甲寅之變士多遠徙學使者按籍除之公力爲請復至數百人旋陞太學助教未幾致仕歸

黃安縣志

人物卷八

儒林

七

生平不爲矯節畸行待人以誠忘人之怨布衣蔬食淡如也卒年七十有三

盧維茲字持庵美丰姿五歲通尙書八歲能文十三補弟子員弱冠食餼以明經司訓均州值兵燹後士多廢業爲整飭學規嚴月課上憲廉其才委充武當山提舉一切稅課外革除陋規奉修山志悉心搜羅成書十卷以母喪去官有弟八人中鄉會科各二合刊弟兄麟經稿邑令張公舉鄉飲大賓病不能行遣輿迎至人咸以爲榮年六十卒